

gleichwoll auch desselben verfehlet hat. Solches sey die gantze beschaffenheit des Wercks, worinnen sich Stallman vnd Kappaun gerecht vnd beides Gott vnd alle Welt vmb hülffe, vnd kräftige ehndung²¹ vnd verbesserung wieder den gemeinen schaden, vnd ihrer geleisteten dienste misbrauch jegen das Vatterlandt, zu höchster Jhrer gefährung^{c22}, vnd insonderheit mit Stallmans vnverschuldeter tyrannischen Verfolgunge, anzuruffen befugt vnd genotigt erachten:

Woraus aber Baner ein Verratherey vnd laster verletzter Mt. machen wolle, allein zu dem endt, das er diese beyde (Stalman vnd Kappaunen) unterdrucke vnd vertilge, alle andere rechtschaffene teutsche Patrioten durch ihr exempel, das sie sich wieder seine Hoheitt, vnd seines gleichen Baner-Schwedischen frevel, nit auch mitt anreizung der Teutschen Fürsten setzen sollen, abschrecke vnd wieder die teutsche Protestirende Stände, auch alle getrewe Patrioten ein præjuditz einführe, als ob die ienige teutschen, so sich in vnd bey diesem bello socialj oder gemeinem Kriege vnter vnd bey Schweden in dienstpflicht eingelassen haben, nit für allen dingen Jhrer Teutschen Vatterlandes, vnd dessen haupter, Stände, landt vnd leuthe, freyheit vnd wolfarth solten für augen behalten, sondern zu bezweck- vnd [37r] vnd [*sic*] schwächung desselben, vnd zu vngerechter vermehrung der Cron Schweden, deroselben allein oder fürnemlich verpflichtet sein; Ja gar Jhnen jura Majestatis im R. Reich wieder vnd über dessen vnterthanen, eingehen vnd bestättigen müssen, so aber ohn das prætendirtes jus bellj widders R. Reich vnd Jhrer König. Bundgenossen, vnd schutzverwandten in deroselben lande, mitt brechung Jr. Mt. Königlichen Worts, handt, vnd Sigel nichts geschehen kan, die gedachte citation rede für sich selbst die feindschaft wieder die citirte personen, vnd ihre gefährung die wiederrechtliche vielfeltige nichtigkeit auch, mit anmassung des juris Mtis. ex jure bellj, die bose intention vnd den schädlichen versuch wieder teutschlandt, desselben F. Stände vnd patrioten, Sonderlich auch darvmb, vnd weil die berührte citation vnd process so offenbar vnd groblich wieder die Mayt. freyheit, vnd wolfarth des R. Reichs, sonderlich auch der Evangelischen Churfürsten vnd Stände sambt dero landt vnd leuthe, lauffen thue. So hat sich ein ieder darahn vnschuldich zuhalten, vnd die nichtichlich citirte personen darauf keines wegcs zu befodern. Es sey Stallman erbietich zu vnpartheilichen rechten, vnd gerichte sich mitt Banern darzustellen, vnd gewertich zu sein, das von Jhrer beiden Leib vnd leben, ehr vnd gutt, erkant vnd exequieret werde, was für Gott vnd der welt recht sey; vngezweifeltes vertrawens die gantze welt befinden werde, wie er in seinem längst hie geendigten Dienste seinem herren kein anderes, als grosse trew vnd sehr nutzliche dienste erwiesen, vnd doch dem R. Reich Teutscher Nation [37v] an seiten der mit Königl. Mt. zu Schweden vereinigter haupter vnd lander durch alle nöthe standhaftich trew verblieben, Baner aber wieder seines Königs gegebenes wort, handt vnd Sigell, trew vnd glauben (in particulari auch ahn Stallman vnd den seinigen, wie sonst in viel mehrern) auch eben noch in dieser gedachter citation vnd process groblich gefrevelt habe vnd handle, der König. Mt. vnd Cron Schweden zu grossem schimpf vnd nachtheill, vnd widders R. Reich, sowol Evangelischen, als Catholischen theils zum vnleidlichen eingriffe, wodurch er an beiden Seiten ins Laster der Vntrew vnd verletzten Mt. gefallen, zu erkleren, vnd also zu be-